

## Analisis Kepatuhan Membayar Zakat Fitrah di Selangor

Mohd Yahya Mohd Hussin  
Fakulti Pengurusan dan Ekonomi  
Universiti Pendidikan Sultan Idris  
E-mel: [yahya@fpe.upsi.edu.my](mailto:yahya@fpe.upsi.edu.my)

Fidlizan Muhammad  
Fakulti Pengurusan dan Ekonomi  
Universiti Pendidikan Sultan Idris  
E-mel: fidlizan@fpe.upsi.edu.my

Mohamad Ali Roshidi Ahmad  
Fakulti Pengurusan dan Ekonomi  
Universiti Pendidikan Sultan Idris  
E-mel: roshidi@fpe.upsi.edu.my

Azila Abdul Razak  
Fakulti Pengurusan dan Ekonomi  
Universiti Pendidikan Sultan Idris  
E-mel: azila@fpe.upsi.edu.my

Nurhanie Mahjom  
Fakulti Pengurusan dan Ekonomi  
Universiti Pendidikan Sultan Idris  
E-mel: [nurhanie@fpe.upsi.edu.my](mailto:nurhanie@fpe.upsi.edu.my)

### ABSTRAK

Kajian ini bertujuan untuk mengenalpasti dan menganalisis kutipan zakat fitrah di Selangor berdasarkan saluran pembayaran formal. Dengan menggunakan data jumlah kutipan zakat fitrah, bilangan penduduk beragama Islam dan kadar zakat fitrah di Selangor dari tahun 1995 hingga 2011, dapatkan kajian menunjukkan jumlah kutipan adalah meningkat dari tahun ke tahun kecuali pada tahun 1998. Walaubagaimanapun, dalam masa yang sama bilangan pembayar yang tidak menggunakan saluran formal ini juga menunjukkan jumlah yang tinggi. Hasil ini jelas menunjukkan bahawa, institusi zakat perlu kepada penambahbaikan berterusan melibatkan sistem pentadbiran, pengurusan, kutipan dan agihan.

Kata Kunci: Zakat Fitrah, Tirisan, Kutipan Zakat, Selangor

### ABSTRACT

*This study aims to identify and analyze the number of zakah fitrah collection in Selangor through the formal payment channel. By using the data on the amount of zakah fitrah collection, the number of Muslims and zakah fitrah rate in Selangor from 1995 to 2011, the research finding shows that the amount of collection is increasing from year to year except for year 1998. However, in the meantime the number of payers who do not use the formal channel is also high. This result shows that, the zakah institution is in need of continuous improvement which involves the administration, management, collection and distribution system.*

*Keywords:* Zakah Fitrah, Leakage, Zakah Collection, Selangor

### PENDAHULUAN

Zakat merupakan rukun Islam keempat yang wajib ditunaikan oleh orang Islam yang telah memenuhi syarat-syaratnya. Allah telah mensyariatkan dan mewajibkan umat Islam untuk mengeluarkan

sebahagian harta mereka iaitu zakat, bertujuan untuk membersihkan diri dan menyuburkan harta pembayar zakat berdasarkan firman Allah yang bermaksud;

*"Ambillah (sebahagian) dari harta mereka menjadi sedekah (zakat) supaya dengannya engkau membersihkan mereka (dari dosa) dan mensucikan mereka (dari akhlak yang buruk)"*

(Surah at-Taubah, 9:103)

Selain itu juga, zakat dapat mewujudkan sifat bersyukur terhadap nikmat yang diberikan oleh Allah dan dapat mengelakkan sifat kedekut, bakhil serta tamak golongan berada. Segala bentuk kekayaan yang dikurniakan Allah di muka bumi tidak boleh dinikmati hanya oleh satu golongan tertentu iaitu golongan berada sahaja, sebaliknya kekayaan itu perlu beredar dalam kalangan semua ahli dalam masyarakat (Patmawati, 2008). Oleh itu, wang zakat digunakan untuk pelbagai tujuan seperti pembasmian kemiskinan, peningkatan taraf hidup masyarakat, penyuburan ekonomi dan lain-lain lagi. Oleh sebab itu, kepentingan hasil zakat kepada negara amnya dan masyarakat Muslim khususnya, tidak dapat disangkal lagi (Ram al Jaffri, 2009). Zakat bukan sahaja disyariatkan untuk membantu golongan kurang berkemampuan tetapi sangat penting untuk pembangunan ummah.

Sistem zakat pada amnya mempunyai banyak persamaan dengan sistem cukai pendapatan. Kedua-dua sistem ini melibatkan pungutan wang oleh wakil-wakil kutipan yang dilantik oleh pihak berkuasa daripada individu atau syarikat tertentu untuk kegunaan tertentu. Tetapi dari segi falsafah dan konsepnya, sistem zakat dan cukai pendapatan adalah berbeza (Kamil, 2006). Kutipan wang zakat bertujuan untuk diagihkan kepada lapan golongan asnaf seperti yang telah dinyatakan di dalam al-Quran, iaitu fakir, miskin, amil, muallaf, riqab, gharimin, fisabilillah dan ibnu sabil. Manakala kutipan wang cukai digunakan oleh pemerintah untuk membiayai pelbagai projek dan pentadbiran kerajaan. Undang-undang yang digunakan dalam sistem cukai pendapatan ialah undang-undang khusus iaitu Akta Cukai Pendapatan 1967 dan akta-akta dan undang-undang tambahan yang lain yang telah dibahaskan dan diluluskan oleh Parlimen. Sistem zakat pula dinaungi di bawah enakmen negeri masing-masing di bawah pentadbiran Hal Ehwal Agama Islam Negeri (Hasnan, 2006). Selain itu, masyarakat Islam perlu mempelajari tentang hukum hakam mengenai zakat supaya mereka tidak tergolong dalam golongan murtad (Shofian dan Amir Husin, 2002). Mereka perlu tahu bahawa zakat akan melibatkan tentang keberkatan hidup di dunia dan akhirat.

## ZAKAT FITRAH

Zakat fitrah adalah pembayaran yang diwajibkan ke atas setiap individu muslim lelaki dan perempuan, yang berkemampuan dengan syarat-syarat yang telah ditetapkan. Zakat fitrah juga dirujuk sebagai zakat yang diwajibkan dengan sebab *furur* iaitu berbuka atau tamat puasa pada bulan Ramadhan (Zamzuri Zakariya, 2006). Apabila pembayaran dilakukan setelah melakukan solat Aidilfitri, tidak lagi dinamakan *zakatul fitrah* (al-Qardawi, 1988). Kewajipan membayar zakat fitrah ini dapat menyucikan amalan individu pada bulan Ramadhan dan seterusnya mencapai kejayaan di dunia dan akhirat sebagaimana firman Allah s.w.t yang bermaksud;

*"Dan pada harta mereka ada bahagian tertentu untuk orang miskin yang meminta dan juga yang tidak meminta"*  
 (Al-Maarij, 70: 24 & 25)

Kadar zakat fitrah bagi negeri-negeri di Semenanjung Malaysia adalah berdasarkan ketentuan oleh Majlis Agama Islam Negeri masing-masing mengikut timbangan satu gantang Baghdad bersamaan dengan 2.70 kilogram atau senilai dengannya. Menurut al-Sayuti (2005), asas atau syarat utama kewajipan zakat fitrah adalah memiliki lebihan makanan pada malam dan pagi 1 Syawal atau Hari Raya. Menurut JAKIM (2001), Sekiranya seorang individu mempunyai 5 orang anak, tetapi hanya mampu untuk diri seorang sahaja, maka wajib dikeluarkan fitrah untuk dirinya sahaja. Bagi Mazhab Hanafi dan Ja'fari, dimaksudkan dengan orang yang memiliki lebihan makanan ialah orang yang mempunyai harta kekayaan yang mencapai nisab, atau yang senilai dengannya yang merupakan kelebihan daripada keperluannya (Ibn Rushd, 1991).

## **OBJEKTIF KAJIAN**

Objektif kajian ini adalah untuk menyelidik kepatuhan membayar zakat fitrah dalam kalangan umat Islam di negeri Selangor dengan menggunakan data jumlah kutipan zakat fitrah di Selangor mulai tahun 1995 hingga tahun 2011. Pengukuran menggunakan data zakat fitrah dipilih adalah disebabkan beberapa faktor iaitu; i) zakat fitrah merupakan zakat badan yang diwajibkan sempena berakhirnya bulan Ramadhan mengikut syarat-syarat yang ditentukan, ii) kadar nisab zakat fitrah adalah sama di setiap negeri iaitu satu gantang Baghdad makanan asasi, iii) syarat-syarat kelayakan membayar zakat fitrah yang minimum, dan iv) populasi masyarakat Islam di negeri Selangor adalah sebanyak 57.9% daripada jumlah penduduk (Jabatan Perangkaan Malaysia, 2011). Menerusi hasil analisis ini, bilangan individu yang tidak menunaikan zakat fitrah dapat dikenal pasti. Jumlah perbezaan pembayar yang diperoleh dapat dijadikan sebagai satu alat pengukur supaya pihak lembaga zakat akan lebih peka tentang masalah ini dan membuat penambahbaikan dalam kerangka institusi zakat di Selangor.

## **KAJIAN LITERATUR**

Zakat merupakan rukun Islam yang keempat dan merupakan sebahagian dari ibadah dalam kehidupan umat Islam. Terdapat beberapa kajian yang telah dilakukan berkaitan dengan kesedaran, kutipan dan pengagihan zakat di Malaysia, antaranya kajian yang dilakukan oleh Md Zyadi dan Mariani (1999) serta Nor Ghani, Mariani, Jaafar dan Nahid Ismail (2001) yang membincangkan kesan penswastaan ke atas peningkatan kutipan zakat. Walaupun penswastaan memberikan kesan positif kepada hasil kutipan, namun perubahan sikap dan kesedaran individu muslim untuk melaksanakan tanggungjawab ini adalah lebih signifikan.

Hal ini dapat dibuktikan melalui kajian Sanep dan Hairunnizam (2005) mengenai kesediaan membayar zakat bagi empat kategori harta diikhtilaf iaitu pendapatan, pertanian, ternakan dan galian. Secara purata, 52.9% dari 2,500 responden bersetuju pengenaan zakat terhadap harta ini. Namun, dari segi kesediaan membayar zakat ke atas pendapatan perundingan dan honorarium pula, didapati hanya 23 -26% responden sahaja yang bersedia melakukannya. Dari sudut zakat ternakan haiwan seperti lembu, kambing dan sebagainya, kesediaan membayar pula secara puratanya adalah 42% sahaja.

Selain dari kesedaran individu, faktor yang turut menyokong pembayaran zakat ialah keberkesanan pengurusan zakat. Kajian Sanep, Hairunnizam dan Adnan (2006) mendapati, 10.5% pembayar zakat menunaikan tanggungjawab ini secara terus kepada asnaf tanpa melalui institusi zakat. Ini kerana, kebanyakannya tidak berpuas hati terhadap bentuk agihan yang telah dilaksanakan oleh institusi pengurusan zakat. Dapatkan kajian ini juga menunjukkan bahawa, persepsi ini telah mempengaruhi jumlah kutipan secara signifikan. Ini menyebabkan pengagihan zakat secara lebih tersusun menjadi cabaran kepada institusi-institusi zakat di Malaysia. Hairunnizam, Sanep dan Radiah (2009) turut membuktikan sebanyak 47.6 peratus responden (332 orang) yang tidak berpuas hati dengan kaedah pengagihan zakat turut tidak akan membayar zakat melalui institusi zakat. Ini menunjukkan hampir majoriti responden tidak membayar zakat yang berkemungkinan kerana mereka tidak berpuas hati dengan kaedah pengagihan zakat oleh institusi zakat. Dapatkan yang sama juga ditunjukkan dalam kajian Kamil, Derashid dan Engku Ismail (1997) berkaitan zakat penggajian. Sikap kepatuhan untuk membayar melalui saluran formal adalah penting bagi membolehkan pengurusan dan pengagihan zakat lebih efisien. Dalam situasi ini, Aidit (1998) berpandangan bahawa akta dan undang-undang yang menyokong khusus berkaitan pembayaran zakat adalah penting bagi meningkatkan kesedaran membayar sebagaimana patuhnya pembayar dengan wujudnya Akta Cukai Pendapatan 1967.

Dalam kajian Kamil (2006) berkaitan kepentingan undang-undang dalam pelaksanaan zakat, kebanyakan responden berpandangan undang-undang zakat di Malaysia berada pada tahap lemah. Dengan menggunakan teori pembelajaran sosial (*social learning theory*), manusia akan melaksanakan tanggungjawab jika merasakan dirinya terancam. Walaupun kajian yang dilaksana tidak dapat menunjukkan hubung kait yang signifikan antara pembayaran dan undang-undang, beliau berpandangan bahawa undang-undang yang positif akan meningkatkan jumlah bayaran. Oleh sebab itu, penguatkuasaan adalah penting bagi memastikan tiada anggota masyarakat yang terlepas dari melaksanakan tanggungjawab ini.

Siti Mashitoh (2007) menghuraikan dengan lanjut konsep sistem perundangan zakat di Malaysia. Faktor yang menyebabkan undang-undang zakat di Malaysia tampak lemah adalah disebabkan sistem perundangan yang begitu terhad. Keadaan ini telah memberi ruang kepada fenomena kegagalan membayar zakat dan tentangan terhadap perundangan zakat sedia ada. Oleh itu, Ram Aljaffri, Karim & Zainol (2009) mencadangkan agar institusi zakat perlu membina penerimaan positif

masyarakat dengan meningkatkan ketelusan dan pendedahan secara menyeluruh mengenai segala urusan berkaitan zakat yang sedang atau telah atau akan dilaksanakan. Ini seterusnya mampu mengurangkan rasa bimbang dan was-was terhadap institusi zakat.

Dalam kajian Ahmad Hidayat (2006) berkaitan dilema perundungan ini, ia mendapat statistik gagal membayar zakat fitrah di Perak telah menunjukkan peningkatan bagi tahun 1953 dan 1954 iaitu dari 69,000 orang kepada 84,000 orang. Abdul Rahim (2005) juga mendapat hanya 10 peratus daripada 5000 ribu peniaga yang layak membayar zakat menunaikan tanggungjawab mereka di Wilayah Persekutuan Kuala Lumpur. Di samping itu, Mohd Helmi (2002) turut mendedahkan hampir 80 peratus syarikat Islam tidak membayar zakat.

Berdasarkan kajian lepas ini, jelas menunjukkan bahawa ketirisan wujud dalam pembayaran zakat atas pelbagai faktor. Oleh itu, kajian ini akan menganalisis sejauhmana ketirisan ini wujud pada masa kini menggunakan data zakat fitrah. Melalui hasil penyelidikan ini, ianya dapat dijadikan rujukan dalam menambah baik institusi zakat di Malaysia.

## METODOLOGI KAJIAN

Analisis kajian ini menggunakan data kadar zakat fitrah dan jumlah kutipan di negeri Selangor sebagaimana yang dilaporkan oleh Lembaga Zakat Selangor. Tempoh kajian adalah dari tahun 1995 hingga tahun 2011. Bagi memperoleh bilangan pembayar zakat fitrah di negeri Selangor, persamaan berikut digunakan:

$$X_t = \frac{JKF_{K_t}}{KF} \quad (1)$$

$X$	= Bilangan Patuh Membayar Zakat Fitrah
$JKF_K$	= Jumlah Kutipan Zakat Fitrah Keseluruhan
$KF$	= Harga Zakat Fitrah
$t$	= tahun

Dengan menggunakan anggaran tetap bahawa penduduk Islam di Selangor adalah sebanyak 57.9% sepanjang tempoh kajian, maka bilangan individu beragama Islam yang dianggap dalam kategori “bocoran” dapat dihitung berpandukan rumus berikut:

$$Z_t = (0.579 * P_{Kt}) - X_t \quad (2)$$

$Z$  ialah bilangan individu yang tidak menyalurkan bayaran zakat fitrah kepada institusi formal, manakala  $P_{Kt}$  ialah populasi keseluruhan penduduk di negeri Selangor pada tahun  $t$ .

Hasil  $(0.579 * P_{Kt})$  dalam persamaan 2 juga dapat diringkaskan sebagai  $P_t$  iaitu bilangan penduduk Islam pada sesuatu tahun.

## HASIL DAN PERBINCANGAN

Dengan menggunakan rumus dalam persamaan 1 dan 2, maka analisis keseluruhan dari tahun 1995 hingga 2011 dapat diperolehi seperti dalam jadual 1.

Berdasarkan Jadual 1, beberapa dapatan kajian penting diperolehi iaitu bilangan populasi masyarakat Islam ( $P_1$ ) di Selangor menunjukkan peningkatan iaitu dari 1.86 juta orang pada tahun 1995 kepada 3.30 juta orang pada tahun 2011. Pertumbuhan populasi masyarakat Islam ini secara puratanya adalah sebanyak 4.5 peratus setahun. Jika dilihat, kadar pertumbuhan ini adalah selari dengan kadar kelahiran dan kematian yang dicatatkan di Malaysia.<sup>1</sup>

Di samping itu, kadar bayaran zakat fitrah (KF) juga menunjukkan trend peningkatan setiap tahun. Keadaan ini secara tidak langsung telah mempengaruhi jumlah kutipan zakat (JKF) yang menunjukkan aliran meningkat dari RM3.14 juta (62.5 peratus) pada tahun 1995 kepada RM17.9 juta (77 peratus) pada tahun 2011. Bilangan pembayaran zakat fitrah melalui institusi formal di Selangor

<sup>1</sup> Kadar kelahiran di Selangor pada tahun 2010 ialah 20.7 peratus, manakala kadar kematian pada tahun yang sama adalah sebanyak 3.8 peratus. Sila rujuk, [http://www.statistics.gov.my/portal/index.php?option=com\\_content&view=article&id=533&Itemid=111&lang=b&negeri=Selangor](http://www.statistics.gov.my/portal/index.php?option=com_content&view=article&id=533&Itemid=111&lang=b&negeri=Selangor)

juga menunjukkan peningkatan iaitu seramai 1.16 juta orang pada tahun 1995 kepada 2.56 juta orang pada tahun 2011 iaitu peningkatan sebanyak 120 peratus untuk tempoh 17 tahun.

Walaupun secara puratanya wujud aliran meningkat dalam jumlah kutipan dan bilangan pembayar zakat, namun bandingan berdasarkan kepada bilangan pembayar zakat (X) dan populasi masyarakat Islam ( $P_1$ ), jelas menunjukkan jumlah bocoran (Z) yang secara umumnya tinggi pada setiap tahun. Berdasarkan jumlah Z, jika diandaikan bahawa 50 peratus daripadanya merupakan golongan yang membayar zakat terus kepada asnaf tanpa melalui institusi formal, maka keseluruhannya jumlah golongan yang tidak melaksanakan kewajipan membayar zakat sama ada melalui institusi formal atau sebaliknya (Y) adalah stabil dalam jumlah yang besar iaitu di antara 0.29 juta orang hingga 0.50 juta orang dalam tempoh yang dikaji. Oleh yang demikian, masalah kegagalan dalam membayar zakat fitrah atau ketirisan ini tidak seharusnya berlaku, dan perlu dipandang serius oleh masyarakat kerana ia tidak dinilai berdasarkan kepada tahap kekayaan. Ini kerana antara syarat asas yang perlu dipenuhi bagi pembayar zakat adalah terlalu minimum iaitu memiliki lebihan makanan pada malam dan pagi Hari Raya Aidilfitri.

Berdasarkan andaian bahawa semua masyarakat Islam yang tidak membayar zakat (Z) adalah layak untuk mengeluarkan zakat fitrah, maka jumlah zakat fitrah yang tidak dibayar kepada institusi zakat formal di Selangor adalah begitu besar iaitu RM1.8 juta pada tahun 1995 meningkat kepada RM5.2 juta pada tahun 2011. Keadaan ini mungkin berlaku disebabkan oleh pembayaran zakat fitrah dilakukan secara terus kepada asnaf tanpa melalui institusi zakat formal. Selain itu, situasi seumpama ini mungkin wujud kerana masih terdapat segelintir masyarakat yang kurang peka akan kewajipan menunaikan zakat fitrah. Mereka tidak sedar bahawa zakat fitrah yang dikeluarkan akan dapat membantu golongan-golongan tertentu, serta mendapat keberkatan daripada Allah s.w.t.

## KESIMPULAN

Setelah meneliti dan membuat kajian, kutipan zakat fitrah di Selangor menunjukkan bilangan pembayar zakat yang menggunakan institusi formal menunjukkan peratusan peningkatan kecuali pada tahun 1996, 1998, 1999 dan 2001. Jumlah kutipan zakat pada setiap tahun juga menjelaskan bahawa masih terdapat sebilangan umat Islam di Selangor tidak membuat pembayaran zakat. Antara cadangan yang boleh diambil untuk memantapkan institusi zakat adalah dengan membuat majlis penerangan mengenai zakat untuk mentarbiahkan umat Islam terutama golongan muda (Ahmad Shahir & Adibah, 2010). Pihak yang bertanggungjawab harus memberi gambaran yang terperinci supaya pemahaman umat Islam mengenai zakat dengan lebih meluas kerana zakat tidak hanya tertumpu kepada zakat fitrah semata-mata. Selain itu, sistem pengurusan harus lebih sistematik supaya pembayar zakat boleh membayar zakat dengan mudah dan golongan yang layak menerima akan mendapat haknya sebagai penerima zakat. Ini seterusnya mampu meyakinkan pembayar zakat bahawa institusi zakat sebenarnya berkebolehan mengutip dan mengagihkan zakat dengan cekap dan secara tidak langsung dapat meningkatkan kutipan zakat melalui institusi formal.

## BIBLIOGRAFI

- Ahmad Hidayat Buang (2006), “Dilema Perundangan Zakat di Malaysia: Antara Penguatkuasaan dan Strategi Pujukan/Galakan/Intensif Membayar Zakat” dalam *Zakat: Pensyariatan, Perekonominian dan Perundangan* (suntingan) Abdul Ghafar Ismail dan Hailani Muji Tahir, Bangi: Penerbit UKM.
- Ahmad Shahir bin Makhtar dan Adibah bt. Abdul Wahab. (2010). *Pengurusan Zakat di Selangor: Isu dan Cabaran*. Prosiding Konvensyen Kebangsaan & Pengurusan Harta dalam Islam 2010. h.1-33.
- Audit, Ghazali (1998), *Zakat- satu tinjauan*. Petaling Jaya: IBS Buku Sdn Bhd.
- Al-Sayuti (2005), *Sunan al-Nasa'i al-Musamma bi al-Mujtabi bi Syarh al-Hafiz Jalal al-Din al-Sayuti*, Jilid 3 (5-6), No hadis. 2431-2765, Beirut: Dar a-Fikr.
- Hasnan Kasan (2006), ‘Penginstitusian Pentadbiran Hukum Syarak di Semenanjung Malaysia’, *Sari*, Jilid 24 , h. 173-189. Jabatan Perangkaan Malaysia,  
[http://www.statistics.gov.my/portal/index.php?option=com\\_content&view=article&id=533&Itemid=111&lang=bn&negeri=Selangor](http://www.statistics.gov.my/portal/index.php?option=com_content&view=article&id=533&Itemid=111&lang=bn&negeri=Selangor) 10 Februari 2013.
- Ibn Rusyd (1991), *Terjemahan Bidayatul Mujtahid*, (terj) M.A Abdurrahman, A.Haris Abdullah, Kuala Lumpur: Victory Agencies.

- JAKIM (2001), Panduan Zakat di Malaysia, Kuala Lumpur: JAKIM.
- Kamil Md Idris, Chek Derashid dan Engku Ismail. (1997). Zakat penggajian: Suatu tinjauan terhadap pengetahuan dan amalan muslimin negeri Perlis. Kertas kerja di bentangkan di Seminar Penyelidikan Universiti, Universiti Utara Malaysia, Sintok, Kedah [atas talian] <http://www.ukm.my/hairun/kertas%20kerja/kesedaran%20membayar%20zakat%20pendapatan.pdf>, 10 November 2010.
- Kamil Md. Idris (2006), “Kesan Persepsi Undang-undang dan penguatkuasaan zakat terhadap gelagat kepatuhan zakat pendapatan gaji”, dalam *Zakat: Pensyariatan, Perekonomian dan Perundangan* (suntingan) Abdul Ghafar Ismail dan Hailani Muji Tahir, Bangi: Penerbit UKM.
- Md Zyadi Tahir & Mariani Majid (1999). “Prestasi kutipan dan agihan zakat di Malaysia” dalam *Pascasidang Seminar Pengeluaran Awam dan Swasta: Justifikasi dan Realiti di Malaysia*. Fakulti Ekonomi, Universiti Kebangsaan Malaysia. h. 293-306.
- Mohd Helmi Foad, ‘Hampir 80% Syarikat Islam tidak bayar Zakat’, *Utusan Malaysia*, 4 Mei 2002.
- Nor Ghani Md Nor, Mariani Majid, Jaafar Ahmad dan Nahid Ismail (2001), “Can privatization improve performance? Evidence from zakat collection institutions”. *Kertas kerja Bengkel Ekonomi Islam*. Fakulti Ekonomi, Universiti Kebangsaan Malaysia.
- Patmawati Ibrahim (2008), ‘Pembangunan Ekonomi Melalui Agihan Zakat: Tinjauan Empirikal’, *Jurnal Syariah*, Jil. 16 Bil. 2, h. 223-244.
- Ram al Jaffri Saad, Kamil Md. Idris dan Zainol Bidin (2009), ‘Peraturan Pembayaran Zakat kepada Isstuti Zakat: Sikap Peniaga dan Kesannya Terhadap Gelagat Pembayaran Zakat perniagaan’, *Jurnal Syariah*, Jil. 17 Bil. 3, h. 607-630.
- Sanep Ahmad & Hairunnizam Wahid (2005b), “Persepsi dan Faktor Penentu Kesedaran Terhadap Perluasan Sumber Zakat Harta Yang Diikhtilaf”, *Islamiyat*, Jil. 27 Bil. 1, h.45- 65
- Sanep Ahmad, Hairunnizam Wahid & Adnan Mohamad (2006), “Penswastaan Institusi Zakat dan Kesannya Terhadap Pembayaran Secara Formal di Malaysia”, *International Journal of Management Studies* Jil.13 Bil 2, h. 175- 196.
- Shofian Ahmad dan Amir Husin Mohd. Nor. (2002). *Zakat Membangun Ummah*. Kuala Lumpur: Utusan Publications & distributors Sdn. Bhd.
- Siti Mashitoh Mahamood (2007), “Sistem perundangan zakat di Malaysia: Antara Realiti dan Harapan”, *Persidangan Zakat & Cukai Kebangsaan 2007*, Kuala Lumpur: PWTC, 22 Mei 2007, h. 3-7.
- Zamzuri Zakariya (2006), ‘Zakat Galian: Sumber yang diitifaq dan diikhtilaf’ dalam *Zakat: Pensyariatan, Perekonomian dan Perundangan* (suntingan) Abdul Ghafar Ismail dan Hailani Muji Tahir, Bangi: Penerbit UKM.

JADUAL 1: Analisis Kutipan Zakat Fitrah di Selangor

TAHUN	JKF (RM Juta)	KF (RM)	X (juta orang)	P <sub>1</sub> (juta orang)	Z (juta orang)	Y (juta orang)	Sasaran Kutipan (rm.juta)	Jumlah Tirisan (rm.juta)
1995	3.14	2.70	1.16	1.86	0.70	0.35	5.022	1.882
1996	3.65	3.20	1.14	1.92	0.78	0.39	6.144	2.494
1997	4.99	3.40	1.47	2.05	0.58	0.29	6.970	1.980
1998	4.34	3.40	1.28	2.16	0.88	0.44	7.344	3.004
1999	4.53	3.70	1.22	2.22	1.00	0.50	8.214	3.684
2000*	5.70	3.70	1.54	2.28	0.74	0.37	8.436	2.736
2001	6.27	4.20	1.49	2.41	0.92	0.46	10.122	3.852
2002	7.97	4.50	1.77	2.51	0.74	0.37	11.295	3.325
2003	8.28	4.50	1.84	2.60	0.76	0.38	11.700	3.420
2004	9.09	4.70	1.93	2.61	0.68	0.34	12.267	3.177

2005	9.34	4.70	1.99	2.71	0.72	0.36	12.737	3.397
2006	9.89	4.70	2.10	2.82	0.72	0.36	13.254	3.364
2007	11.5	5.20	2.21	2.89	0.68	0.34	15.028	3.528
2008	12.3	5.20	2.36	2.98	0.62	0.31	15.496	3.196
2009	16.6	7.00	2.37	3.05	0.68	0.34	21.350	4.750
2010	17.3	7.00	2.47	3.15	0.68	0.34	22.050	4.750
2011	17.9	7.00	2.56	3.30	0.74	0.37	23.100	5.200

\*Secara keseluruhannya, jumlah kutipan zakat fitrah pada tahun 2000 ialah sebanyak RM11.4 juta. Hal ini disebabkan oleh, pada tahun tersebut terdapat dua kali Ramadhan iaitu 9 Dis.1999 – 7 Jan. 2000 & 27 Nov. 2000 – 26 Dis. 2000. Berdasarkan jumlah kutipan tersebut, dianggarkan bahawa kutipan pada setiap tempoh adalah sebanyak RM5.70 juta.